

Ilulissat kangerluata UNESCO-miittortaata angissusaata pitsaaqutai ajoqutaalu pillugit Naalakkersuisut UKA2022-mut saqqummiussassamik nassuiaasioqqullugit peqquneqarnissaanut Inatsisartut aalajangiiffigisassaattut siunnersuut.

(Aqqalu C. Jerimiassen, Atassut)

Akissutitut allakkiaq

(Nunalerinermut, Imminut Pilersornermut, Nukissiutinut Avatangiisinullu Naalakkersuisoq)

Siullermeenera

Aalajangiiffigisassatut siunnersuummut saqqummiunneqartumut Inatsisartuni ilaasortaq Aqqalu C. Jerimiassen, Atassut Naalakkersuisut qutsavigaat.

Ilulissat Kangianni UNESCO-p Nunarsuarmi Kingornussaqaarfia pillugu illersuinissaq Naalakkersuisut pingaartuutikkaat aallarniutigalugu erseqqissaatigerusuppara. Sumiiffik nunarsuarmi kingornussaqaarfittut inissinneqaraangat immikkut ittumik akuersissuteqarnermik pisussaaffeqarnermillu nassataqartarpoq. Nunarsuarmi Kingornussaqaarfik tassaavoq pinngortitami sumiiffik asseqanngilluinnartoq, Nunatsinnut assut naleqarlunilu pingaaruteqartoq. Ilami nunarsuarmut tamarmut.

Aningaasaqarnermik 2013-imi misissueqqissaarineq suliarineqarpoq. Misissueqqissaarinerup takutippaa, Nunarsuarmi Kingornussaqaarfittut inissisimaffigisaannaq taamanikkut ukiumut 63,5 mio. koruuninik naleqartoq. Ilulissat Kangiata Illorsua pilersinneqarsimalerpoq, aammalu Ilulissanut takornarianik suli amerlanerusunik nassataqartitsisussamik mittarfimmik nutaamik sanaartorneq maanna ingerlapparput. Nunarsuarmi Kingornussaqaarfiup sumiiffigisarpiata iluani akunnittarfiliornissamut tunngatillugu artukkiinerit annertusiartuaassapput, ammaaffigissagutsiguli pinngortitaq pinneqisoq, attorneqarsimanngitsutullu isikkorisaaq aserussavarput. Takornariallu tamakkorpiat misigisaqarfiginiarlugit takkuttarput, tassaappullu sumiiffiusumik assisaqartitsinningsut. Nunarsuarmi Kingornussaqaarfiup annertussusaata attannissaa Naalakkersuisut kissaatigaat, taamaalilluta sumiiffiup naleqassusianik ajortisaanissaq ingalassinnaassagatsigu.

Taamaakkaluartorli illoqarfiup allineqarsinnaanissaanik Avannaata Kommuniata pisariaqartitsinera, Naalakkersuisut paasisinnaavaat. Illoqarfik Nunarsuarmi Kingornussaqaarfimmut sillimaniarnermut killeqarfiusumit aamma imeqarfimmut killeqarfiusumit maanna ungalusimaneqarpoq, killeqarfinnilu taakkunani tamani sanaartornissaq inerteqqutaavoq. Killeqarfiit marluusut taakku illoqarfimmut qanittuararsuupput.

Ikaarsaariarfittut killeqarfik tassaavoq Nunarsuarmi Kingornussaqaarfippiamik kaajallaasoq – sumiiffimmut immikkut illersuutaalluni. Killeqarfillu taanna kommunip pilersaarutaani aalajangersarneqarpoq, killeqarfiup ilaani aalajangersimasuni Avannaata Kommuniata sanaartornernut allanillu suliarisanut ammaasoqarsinnaanera pillugu misissuineranut Naalakkersuisut ikiuerusupput. Taamatuttaaq kommunip imeqarfiup killeqarfiata illoqarfimmiit ungasinnerusumut nuunneqarnissaa kissaatigigaa Naalakkersuisunit eqqumaffigineqarpoq.

UNESCO-qarfiup Ilulissat illoqarfianut taama qanitsigisumik inissinneqarsimanerani iluaqutissat amerlisinniarlugit ajoqutissallu annikillisinniarlugit qanoq iliortoqarsinnaanersoq misissuiffigerusupparput. Nunarsuarmi Kingornussaqaqarfimmik annertunerpaamik iluaquteqarnissarput pingaaruteqarpoq.

Taamaattumik taama oqaaseqarlutik allannguutissatut siunnersuummik matuminnga Naalakkersuisut inassuteqarput:

Ilulissat Kangianni UNESCO-qarfimmi iluaqutissat annertusitinniarlugit aamma ajoqutissat annikillisinniarlugit periarfissat pillugit nassuiaammik, 2023-mi Upernaakkut Ataatsimiinnermi saqqummiunneqartussamik Naalakkersuisut suliaqarnissamut peqquneqarnissaat pillugu Inatsisartut aalajangiiffigisassaattut siunnersuut.